

■ COLUMNA

Ina midada – milli modas

DA FLAVIA HOBI

En la Rumantschia èsi tradiziun ch'ils uffants van da Bumaun dad isch tar isch per giavischar in bun onn nov. Lura dat i il blier anc ina u l'otra munaida – tar la quala ins na di naturalmein betg na. Silvester sez vegn festivà sin differentas modas; saja quai en famiglia, cun amis u persuls – forsa cun ina gronda parti, forsa cumadaivel en ina chamona insanua en la naiv u simpla-main a chasa en in conturn sa disà. Interessant è dentant era ina u l'otra tradiziun pratitgada durant la midada da l'onn en ils auters pajais dal mund.

Tge che na dastga per exempel betg mancar en Spagna èn las uvas. Dudesch secundas avant mesa-notg, vul dir avant che l'onn nov cumenza, vegn mess cun mintga tuc in'uva en bucca, pia en tut dudesch uvas. Tgi che na dumbra betg endretg, quel ha da quintar cun disletg durant l'onn vegnint. La tradiziun da Silvester ch'ins viva en Bulgaria para forsa in pau pli speziala. La notg da Silvester van ils uffants



da chasa tar chasa per pitgar cun ina roma decorada da tuttas colurs e numnada «Surwatschka» sin il dies da las abitantas e dals abitants. Las pitgadas sin il dies duessan purtar sanadad e ritgezza ed ils uffants survegnan persuerter fritgs, dultschims, petta u daners. En Russia cumenza cun Silvester ina fasa da festa che dura diesch dis. Lura porta Väterchen Frost ensemen cun sia cumpogna «Snegurotschka» (floc da naiv) la notg da Silvester ils regals. Las festas che vegnan festivadas en l'entir pajais numn'ins «Jolka» (pign) perquai che tut la famiglia sesa enturn il pign e mangia ensemen. Interessant è er l'usit ch'ins viva en Scozia. Là baiva la glied du-

rant «Hogmanay», la festa da Bumaun, in punsch ch'ins numna «Hot Pint». Questa bavronda cuntegn ultra da whisky e biera ferma er ovs. Latiers mangian els ina petta da fritgs gratinada, numnada «Black Bun» e «Haggis», maguns da nursas emplenids. En l'America u en Tschechia mangian ins percunter il blier lentiglias. Il motiv perquai è che las lentiglias han ina furma da munaida, uschia che questa spisa duess simbolisar bainstanza per l'onn nov. En la Tschechia culan dal rest bleras famiglias plum per guardar en il futur u ch'els fan permez in mail per leger lur destin.

Pertge e co che questas tradiziuns èn sa svilupadas è in'otra istorgia, se gir è ch'ellas duessan purtar cletg als carstgauns. Latiers vegnan ellas dadas vinavant dapi bliers tschientaners, tge che dat ina tscherta segirtad e tge ch'unescha nus. Po tgunsch esser che l'impurtanza da tals usits ed il sustegn ch'els portan vegn sutvalità mintgatant u ch'ins n'è forsa betg vairamain avunda conscient da lur valor.